

摘藻堂四庫全書薈要

經部

欽定四庫全書薈要

經部

欽定禮記義疏卷六十九

詳校官編修臣程嘉謨



欽定四庫全書薈要卷二千五百三十二

經部

欽定禮記義疏卷六十九

緇衣第三十三

正義孔氏穎達曰案鄭目錄云名曰緇衣者善其  
好賢者厚也緇衣鄭詩也此於別錄屬通論 陸

氏德明曰劉瓛云公孫尼子所作 呂氏大臨曰

篇中有好賢如緇衣語故以是名篇 方氏慈曰

此篇凡二十四節大抵多明人之好惡人之所宜

好者莫如賢所宜惡者莫如惡緇衣好賢之詩也  
經正引此故以名篇 朱子曰緇衣兼惡惡獨以  
緇衣名篇者以見聖人有心於勸善無心於懲惡  
也 馮氏椅曰篇中多依倣聖賢之言其文有不  
純義有不足者多矣

子言之曰為上易事也為下易知也則刑不煩矣

易以  
政反

正義鄭氏康成曰言君不苛虐臣無姦心則刑可以  
措 孔氏穎達曰君上以正理御物則臣事之易臣

下無姦詐則君知其情易 呂氏大臨曰上不務信  
以機心待民則民亦以機心報上上下下之交機心相  
勝姦生詐起欲刑之不煩不可得矣 劉氏彝曰上  
難事則下難知上易事則下易知好惡悖其正喜怒  
失其常於是有匿其誠信以為容悅者屈其忠直以  
為阿諛者包其禍心以為詐偽者

子曰好賢如緇衣惡惡如巷伯則爵不瀆而民作愿刑  
不試而民咸服大雅曰儀刑文王萬國作孚

好呼報反  
惡惡上烏

路反下  
如字

正義鄭氏康成曰緇衣巷伯皆詩篇名緇衣首章曰  
緇衣之宜兮敝予又改為兮適子之館兮還予授子  
之粢兮是其好賢欲其貴之甚也巷伯六章曰取彼  
讒人投畀豺虎豺虎不食投畀有北有北不受投畀  
有昊此其惡惡欲其死之甚也爵不瀆者不輕爵  
人也試用也咸皆也刑法也孚信也儀法文王之德  
而行之則天下無不為信者也文王為政克明德慎

罰 孔氏穎達曰此明好賢惡惡賞罰得中則為民  
所信緇衣鄭風之首美桓公武公詩巷伯小雅篇名  
刺幽王詩瀆濫也愿慤也末所引詩大雅文王之篇  
諫成王之詩 胡氏銓曰緇衣好得其正巷伯惡得  
其正 呂氏大臨曰子曰示之以好惡而民知禁蓋  
誠心不至則好惡不明好惡不明則民莫知其所從  
違如此而欲人心之孚天下嚮風難矣文王好惡得  
其正而一出乎誠心故為天下之所儀刑德之所以

孚於下也

子曰夫民教之以德齊之以禮則民有格心教之以政齊之以刑則民有遯心故君民者子以愛之則民親之信以結之則民不倍恭以涖之則民有孫心甫刑曰苗民匪用命制以刑惟作五虐之刑曰法是以民有惡德而遂絕其世也

孫去聲

正義鄭氏康成曰格來也遯逃也涖臨也孫順也甫

刑尚書篇名

孔疏此尚書呂刑篇而稱甫刑者案孝經序云春秋有呂國而無甫侯國語云



齊許申呂皆由大姜然則呂即甫也孔注尚書呂侯  
後為甫侯故穆王時謂之呂侯周宣王及平王時為  
甫侯匪非也命謂政令也高辛氏之末諸侯有三苗者

作亂其治民不用政令專制御以嚴刑乃作五虐蚩

尤之刑以為法

孔疏苗民九黎之君少昊氏衰上效蚩尤重刑顓頊代少昊誅九黎分流

其子孫為居于西裔高辛之衰又復九黎之君惡堯  
興又誅之堯末又在朝舜時又竄之後王深惡此族  
三生凶惡故著其氏於是民皆為惡起背畔也三苗  
謂之苗民民者冥也

由此見滅無後由不任德孔氏穎達曰此明教民

以德不以刑也論語云有恥且格馬氏晞孟曰德

者所以養人於中而在外有不正則又以禮齊之此順其性命之理而以善養人也故民有格心政者所以率人於外而內有不從則又以刑齊之此逆其性命之理而以力服人也故民有遜心先王之為治德禮以為本刑政以為助 葉氏夢得曰子以愛之信以結之所謂教之以德也恭以涖之所謂齊之以禮也德不止於一故有仁有信禮則恭而已矣 應氏鏞曰書云苗民弗用靈靈善法也今引弗用命命當

# 作靈

子曰下之事上也不從其所令從其所行上好是物下必有甚者矣故上之所好惡不可不慎也是民之表也

好惡並去聲

正義鄭氏康成曰不從其令言民化行不拘於言甚者甚於君也民之從君如景逐表 馬氏晞孟曰令者令之於民行者行之於已令民而使作愿民未必作愿令民而使之服民未必咸服唯好賢如緇衣則

爵不瀆而民作愿惡惡如巷伯則刑不試而民咸服  
所謂從其所行而不從其所令也 陳氏祥道曰言  
之化人也淺行之感人也深故好惡出於正則彼皆  
從而正好惡出於非則彼皆從而非猶表端而影端  
表枉而影枉也故謂民之表

子曰禹立三年百姓以仁遂焉豈必盡仁詩云赫赫師  
尹民具爾瞻甫刑曰一人有慶兆民賴之大雅曰成王  
之孚下土之式

正義鄭氏康成曰遂猶達也言百姓倣禹為仁也孚  
信也式法也皆言化君也 孔氏穎達曰此申明上  
文君為民表不可不慎詩小雅節南山之篇引以證  
民之法則於上甫刑見上引以證上有善行賴及於  
下大雅下武之篇引以證君有善與下為法式也

方氏慤曰禹欲百姓之仁而已及百姓之興仁亦遂  
上之所欲而已故以遂言之 陳氏澣曰豈必盡仁  
言不必朝廷盡是仁人而後足以化民也得一仁人

為民之表則天下皆仁矣所謂君仁莫不仁也

通論孔氏穎達曰禹立三年則百姓盡行仁道論語稱有王者必世而後仁者禹承堯舜禪代之後其民易化論語所稱者謂重離之後故必世乃後仁是以注論語云周道至美武王伐紂至成王乃致太平由承殷紂敝化之後然也

存異鄭氏康成曰言百姓效禹為仁非本性能仁也案民之秉彝好是懿德未有民之本性不可為仁者

謂非本性能仁繆已

子曰上好仁則下之為仁爭先人故長民者章志貞教  
尊仁以子愛百姓民致行已以說其上矣詩云有桔德  
行四國順之

好去聲長工聲說悅  
通桔詩作覺行去聲

正義鄭氏康成曰章明也貞正也民致行已者民之  
行皆盡已心桔大也直也

呂氏大臨曰覺明也訓大  
直未詳案朱子詩傳亦

訓直大又有覺其楹訓覺高大  
而直也則明之義已在其中矣

孔氏穎達曰此結

上經在上行仁之事詩大雅抑之篇刺厲王也引以

證上有其德下所從也 呂氏大臨曰為仁爭先人

者得其良心之所同然靡然嚮風日用而不知也章  
志者明吾好惡以示之貞教者立不可易之道以教  
之所示所教者尊仁而已好仁惡不仁吾所以示之  
也明人倫於上教之使順不使之不順此吾所以教  
之也民致行己以悅其上如子從父母之命盡心力  
以奉之不忍違也 陳氏祥道曰覺出於性而非偽  
故覺為直



子曰王言如絲其出如綸王言如綸其出如綽故大人  
不倡游言可言也不可行君子弗言也可行也不可言  
君子弗行也則民言不危行而行不危言矣詩云淑慎  
爾止不讐于儀

綽與緇通音弗危行而行之  
行竝去聲讐詩作愆字通

正義鄭氏康成曰言言出彌大也

孔疏王言初出微  
細如絲其出行於

外漸大如綸綽  
又大於綸也

綸今有秩嗇夫所佩

孔疏漢十里一  
亭十亭一鄉鄉

有三老有秩嗇夫鄉小者縣亦置嗇夫職同但隨  
鄉大小異名耳所佩則同張華云綸如宛轉繩

綽

引棺索游浮也不可用之言也危高也言不高於行

行不高於言則言行相應也淑善也讐過也言善慎

汝之容止不可過於禮之威儀也孔氏穎達曰詩

大雅抑之篇呂氏大臨曰生於心則形於言形於

言則發於政如絲如綸如緯言其端甚微其末甚大

也為人上者倡之以誠慤篤實之言天下猶有姦欺

以罔上者苟以無根不實之言倡之則天下蕩然虛

浮之風作矣可不慎乎可言而不可行過言也可行

而不可言過行也過言者窮高極深絕類離倫自以

為高明博大然人倫不察庶物不明卒不可行於世  
無用之空言而已過行者可行之一時不可法於後  
世可行之於已不可達之於天下獨行之高行而已  
此君子所以弗言弗行也如此則言行不越乎中民  
將效之言不敢高於行言之必可行也行不敢高於  
言必為可繼之道也引詩言為人上者當善慎其容  
止不過於先王曲禮之儀以証言行之不可過也  
方氏慤曰王以位言大人以道言其言如綸則有位

者之事故曰王不倡游言非有道者不能故曰大人君子則兼上下言之見在上在下皆如此也

子曰君子道人以言而禁人以行故言必慮其所終而  
行必稽其所敝則民謹於言而慎於行詩云慎爾出話  
敬爾威儀大雅曰穆穆文王於緝熙敬止

道與導同行  
竝去聲稽舌

兮反於  
音烏

正義鄭氏康成曰禁猶謹也

孔疏言禁約謹慎  
人以行使行顧言稽

猶考也議也話善言也緝熙皆明也 孔氏穎達曰

此明前經言行之事上詩大雅抑之篇下詩大雅文王之篇言穆穆然美者乃是文王之德嗚呼光明乎又敬其容止證上當敬其言行也 陳氏祥道曰言以明理所以通彼此之情而達之也故道人以言行出於正而率以正則彼莫敢為非也故禁人以行真氏德秀曰言出於口至易也然不慮其所終則一言之過貽患將不勝救行出於身亦至易也然不稽其所敝則一行之差流禍至於無窮不善者固不足

言善矣而慮之不深稽之不遠未有不反而為不善者也况尊居人上言行所關安危自出故必謹之審之而不敢苟則民亦從其化而不苟於言行矣 呂氏大臨曰引抑詩言上之言行不可不慎引文王詩言文之盛德亦不越敬其容止而已

通論陳氏祥道曰孔子於空空之鄙夫則叩兩端而竭焉所謂道人以言也為魯司寇而公慎氏出其妻慎潰氏踰竟而徙所謂禁人以行也 真氏德秀曰

老莊非善言乎其終為浮虛之害夷惠非善行乎其  
敝有隘不恭之失

子曰長民者衣服不貳從容有常以齊其民則民德壹  
詩云彼都人士狐裘黃黃其容不改出言有章行歸于

周萬民所望

長竹丈反下君長同貳或作  
貸同音二下同從七凶反

正義鄭氏康成曰貳不一也章文章也忠信為周

孔氏穎達曰從容有常謂舉動有常度壹謂齊一不  
參差詩小雅都人士之篇言彼明王時都邑之人有

士行者服此狐裘黃黃然行歸忠信萬民所以瞻望以法則之 馬氏晞孟曰長民者處人之上不惟其行貴有常即其形於衣服容貌之際者亦不可無常然後民望其容貌而其德歸於一矣狐裘黃黃服其服也其容不改文以君子之容也出言有章遂以君子之辭也行歸于周萬民所望實以君子之德也 陳氏祥道曰民德之不純常生於奇衰而奇衰之作常兆於衣服之不一狐裘燕居之服黃黃言其色也



燕居之服猶且致一如此則其出而齊民可知矣

存異鄭氏康成曰黃衣則狐裘大蜡之服也

孔疏案詩注云

狐裘取溫裕而已不云大蜡鄭云蜡服者以正衣解之耳詩謂庶人有士行非闕蜡之事故為溫裕也

案衣服不貳所服皆法服也從容禮法之內而又有常安而且久也如是則上之德壹矣以此齊民民德豈有不壹者哉言衣服者亦猶鴈鳩之言其帶伊絲其弁伊騏之意

子曰為上可望而知也為下可述而志也則君不疑於

其臣而臣不惑於其君矣尹吉曰惟尹躬及湯咸有壹

德詩云淑人君子其儀不忒

忒他得反  
或作貳

正義鄭氏康成曰吉當為告古文告字之誤尹告伊  
尹之誥也書序以為咸有壹德咸皆也言君臣皆有  
一德不貳則無疑惑也孔氏穎達曰可望而知謂  
貌不藏情望見其貌則知其情詩曹風鴉鵒篇刺曹  
君之詩言善人君子其儀不有差忒引以證一德之  
義呂氏大臨曰可望而知者不言而喻也可述而

志者可稱述而志之於書也若上有深阻難測之意則雖言而未喻下有隱匿不忠之情則雖言不可信況於志乎此君臣上下所以交相疑惑欲同心為治難矣陳氏祥道曰上以情待下故望其趨舍足以知其情下以情事上故述其功業足以志其情為上可望而知則君於臣無可疑之行為下可述而志則臣於君無可惑之事書言君臣皆有一德此君所以不疑於其臣而臣不惑於其君也陸氏佃曰可望

而知表裏如一可述而志先後如一

存異鄭氏康成曰志猶知也 孔氏穎達曰可述而志謂臣下率誠奉上其行可述敘而知也

子曰有國家者章義瘧惡以示民厚則民情不貳詩云

靖共爾位好是正直

瘧丁但反共音恭好呼報反案陸德明云義尚書作善陳澧本因改

善今從鄭氏原本

正義鄭氏康成曰章明也瘧病也 皇氏侃曰義善

也 孔氏穎達曰有善以賞章明之有惡以刑瘧病

之詩小雅小明之篇刺幽王之詩引證上文民情不貳為正直之行 呂氏大臨曰善居其厚惡居其薄章之瘡之以示民厚則民一歸於理義所以不貳也詩言居位者惟正直是好則所好出於理義民德所以一也 陳氏祥道曰惟民生厚因物有遷有國者知民性之有善而移於習然後為惡故為善則章之使民知善之可為為惡則瘡之使民知惡之可避示民有生厚之善則民致一於善而歸厚矣是以民情

不貳引詩言此章善之謂也 方氏慤曰章善而著之惡者恥其不若則惡者病矣夫不待刑罰而能使惡者知恥則上之用心厚矣民其有攜貳之情乎案民情之本厚者以其直道而行也故在位而好是正直則民自動其天而德壹焉三代之章善瘡惡孔子之無毀無譽孟子曰民之東彝也故好是懿德皆是道也

子曰上人疑則百姓惑下難知則君長勞故君民者章

好以示民俗慎惡以御民之淫則民不惑矣臣儀行不  
重辭不援其所不及不煩其所不知則君不勞矣詩云  
上帝板板下民卒瘡小雅曰匪其止共維王之長上印聲好

呼報反惡烏路反行去聲  
瘡詩作瘡共作恭印音窮

正義鄭氏康成曰難知有姦心也淫貪侈也孝經曰  
示之以好惡而民知禁重猶尚也援猶引也上帝喻  
君也板板辟也卒盡也瘡病也此君使民惑之詩印  
勞也言臣不止於恭敬其職惟使王之勞此臣使君

勞之詩 孔氏穎達曰此明君臣各以情相示則各

得其所君上多疑貳則百姓疑惑下懷欺詐則在上  
治之勞苦也不重辭不尚虛辭也臣下不援引其君  
行所不能及之事不煩亂以君所不知之事則君不  
勞苦矣詩大雅板之篇刺厲王之詩小雅巧言之篇  
刺幽王之詩 呂氏大臨曰篇首曰為上易事為下  
易知又曰為上可望而知為下可述而志此又反覆  
言此者蓋君臣上下之際苟非同心同德一歸於理



義則上下睽乖欲政行而事治未之有也因極言上  
之好惡言行所以示其下者一德而已章好者明吾  
所好唯理義而已非他好也慎惡者慎吾所惡唯非  
理非義而已非他惡也所好未必理義則君好可疑  
欲以化民成俗難矣所惡未必非理非義則君惡可  
疑欲民之不淫難矣臣之事上非理義不行故曰儀  
行非有隱匿詐偽之情不必多言以自解故曰不重  
辭以君力所不能及而援其君則君難從以君智所

不能知而煩其君則君難聽勞其君而無益非所以

事君也板板反也王者反覆二三其德則民莫知所  
從而病矣此證上人疑則百姓惑也邛病也為臣者  
事君不止於恭敬而援其所不及使君病其不能煩  
其所不知使君病其不知此證下難知則君長勞也  
方氏慤曰臣有可儀之行而所重者不在乎辭君  
之所及者道而所不及者事故於所不及者則不援  
之使及君之所知者本而所不知者末故於所不知

者則不煩之

存異鄭氏康成曰儀當為義言臣義事君則行也引君所不及謂必使其君所行如堯舜也不煩以其所不知謂必使其知慮如聖人也凡告喻人當隨其才以誘之

辨正胡氏銓曰孟子曰我非堯舜之道不敢以陳於王前又曰人皆可以為堯舜謂堯舜為不可及不可也謂不必使其君如堯舜尤不可也鄭氏誤矣

案上之疑有二用舍不斷威福莫測善不必賞惡不  
必罰此民所以從違莫定也章善瘳惡法紀昭明則  
民曉然於善之當為而惡之必不可為矣下之難知  
新進喜事浮夸無實聽其言則天下事無不可為而  
發而不收慮而無成如鼂錯之更令王安石之變法  
之類責難陳善人臣之義然堯舜之知而不徧物急  
先務也今援其所不及煩其所不知紛紜滋擾日不  
暇給皆瑣屑煩苛舍本求末者也夫人引君當道中

正是遵俾君不苦於過高之事何勞之有

子曰政之不行也教之不成也爵祿不足勸也刑罰不足恥也故上不可以褻刑而輕爵康誥曰敬明乃罰甫

刑曰播刑之不迪

褻息  
列反

正義鄭氏康成曰言政教所以明賞罰康康叔也作誥尚書篇名播猶施也不衍字耳迪道也言施刑之道皇氏侃曰言在上政令所以不行教化所以不成者祇由爵祿加於小人不足勸人為善刑罰加於

無罪不足恥其為惡賞罰失所故政不行也 孔氏

穎達曰此明慎賞罰之事賞罰不中則勸懲失所故君上不可輕褻之周公作誥告康叔云女所施刑罰必敬而明之甫刑穆王戒羣臣言所為監者皆是伯夷布刑之道引之者證重刑之義 呂氏大臨曰好惡本諸心爵祿刑罰施於政心術不正則政刑從之不可不慎也 陳氏祥道曰爵祿之榮人情所甚欲也且不足以勸其為善刑罰之威人情所甚惡也且

不足以恥其為惡則輕爵以予人猶無益也故上不  
可以輕爵褻刑以加物猶不足禁也故上不可以褻  
刑書言敬以致其謹明以致其察則不可褻刑之意  
也

子曰大臣不親百姓不寧則忠敬不足而富貴已過也  
大臣不治而邇臣比矣故大臣不可不敬也是民之表  
也邇臣不可不慎也是民之道也君毋以小謀大毋以  
遠言近毋以內圖外則大臣不怨邇臣不疾而遠臣不

蔽矣葉公之顧命曰母以小謀敗大作母以嬖御人疾

莊后母以嬖御士疾莊士大夫卿士

治平聲比音昇道與導同母並音無

葉音攝

正義鄭氏康成曰忠敬不足謂臣不忠於君君不敬

其臣邇近也言近以見遠言大以見小互言之比私

相親也民之道言民所循從也圖亦謀也凡謀之當

各於其黨於其黨知其過審也

案過謂繆悞審謂正當

大臣柄

權於外小臣執命於內或時交爭轉相陷害疾猶非



也葉公楚縣公葉公子高也

案此文見逸周書乃祭公謀父將死而告周穆

王之辭以  
為葉公悞

臨死遺書曰顧命小謀小臣之謀也大作

大臣之所為也嬖御人愛妾也疾亦非也莊后適夫  
人齊莊得體者嬖御士愛臣也莊士亦謂士之齊莊  
得體者今為大夫卿士 孔氏穎達曰此明臣無大  
小皆須恭敬謹慎人君無以小臣而謀大事也沈氏  
云大臣離貳不與上相親政教煩苛百姓不寧是臣  
不忠於君君不敬於臣所致由君與臣富貴已過極

也大臣不肯為君治職事由邇臣與上相親比也民之道邇臣好則民從之好邇臣惡則民從之惡也君無與小臣而謀大臣之事無以遠臣言近臣之事無以內臣共謀外臣之事所以然者大小之臣意殊遠近之臣不同恐各為朋黨彼此交爭相害故不圖謀若能如此則內外情通小大意合大臣不怨恨於君也近臣不為人所非毀遠臣不被障蔽也 呂氏大臨曰此言大臣不信而小臣之比國之大患也傳曰

不使大臣怨乎不以大臣之任國之休戚繫焉用之  
斯信之不信斯黜之未有居其位而不信之者也大  
臣不親民疑於所任百姓所以不寧蓋由君之敬不  
足於臣徒富貴之而無信任之意猶犬馬畜之而弗  
敬也事至於此必有邇臣嬖寵奪大臣之權而不得  
治其事故曰大臣不治而邇臣比矣大臣尊嚴國之  
政令存焉民之所望以為表不敬則國命輕矣邇臣  
寵昵君之好惡繫焉民之所從以為道不慎則風俗

壞矣使小臣謀大臣則大臣怨乎不以使遠臣閒近  
臣則近臣疾其君使內之寵臣圖四方宣力之臣則  
遠臣之賢蔽而不聞三者君之大害也 陳氏祥道

曰大臣道之隆德之駿王所尊而隆之者也故言敬  
中庸言敬大臣則不眩是也邇則居王之左右前後  
者欲擇正人而已故言謹書言謹簡乃僚是也敬大  
臣者謂其有師尊之實而下之人所視而效也故謂  
之民之表詩言赫赫師尹民具爾瞻是也謹邇臣者

謂其正朝廷以正萬民而下之人所從而由也故謂之民之道書言侍御僕從罔非正人以至下民祇若萬邦咸休者是也大臣則權重也權重常見謀於小臣矣小臣之謀得行則大臣退故大臣怨君母以小謀大則大臣不怨矣近臣則所親而任親而任則嘗見言於遠臣矣遠臣之言或聽則近臣踈故邇臣疾君母以遠言近則邇臣不疾矣外臣則遠於王也遠於王則易為內臣之所圖矣內臣之圖得用則外臣

之功業不上達於王故遠臣蔽君母以內圖外則遠  
臣不蔽矣小臣之於大臣勢不足以圖之其所以擠  
陷之者謀而已內臣之於外臣謀非不足用也勢足  
以圖之而已故於小大言謀內外言圖怨生乎心疾  
作於外疾不如怨之深也故大臣言怨邇臣言疾  
存異葉氏夢得曰大臣牧伯也近臣四輔三公也外  
臣則諸侯也

案鄭孔以忠屬臣敬屬君於理則似但玩文義總重

親大臣上親者內盡其忠外盡其敬猶孟子待先生  
如此其忠且敬之意百姓不寧由大臣不治之故大  
臣不親由邇臣比之故蓋左右近君善窺意旨巧於  
逢迎大臣方嚴素為其所疾常謀所以間之人主不  
覺每墮其術中如宏恭石顯之殺蕭望之也由是類  
推以遠言近以內圖外中朝若此百姓何以寧哉又  
引葉公語結之

子曰大人不親其所賢而信其所賤民是以親失而教

是以煩詩云彼求我則如不我得執我仇仇亦不我力

君陳曰未見聖若已弗克見既見聖亦不克由聖

案仇鄭讀

逮匹也據詩君子好逮

公侯好仇仇與逮同

正義鄭氏康成曰親失失其所當親也教煩由信賤也賤者無一德也詩言君始求我如恐不得我既得我持我仇仇然不堅固亦不力用我是不親信我也克能也由用也孔氏穎達曰此言君不信用人也在上不親任其所賢有德者而信用其所賤無德者



則民效於上失其所當親唯親羣小政教所以煩亂也詩小雅正月之篇刺幽王詩君陳尚書篇名引以證不親其所賢也馬氏晞孟曰言賢則知賤者為不肖之行言賤則知賢者有可貴之德上失其所親則下亦失其親雖區區於教令之煩民未必從之蓋其令反其所好則民未有從之者也詩言始求我之法則如不我得焉其好之心可謂篤矣及其執我仇仇亦不我力既已得我而反不用我至於君陳所言

其理亦猶是也 陸氏佃曰孟子曰堯舜之知而不  
徧物急先務也堯舜之仁不徧愛人急親賢也今如  
此雖欲不煩得乎

存疑陳氏澔曰仇仇者言不一仇之無往而不忤其

意也

案陳以仇為  
讐非詩意

子曰小人溺於水君子溺於口大人溺於民皆在其所  
褻也夫水近於人而溺人德易狎而難親也易以溺人  
口費而煩易出難悔易以溺人夫民閉於人而有鄙心

可敬不可慢易以溺人故君子不可以不慎也大甲曰  
毋越厥命以自覆也若虞機張往省括于度則釋兌命  
曰惟口起羞惟甲冑起兵惟衣裳在笥惟干戈省厥躬  
大甲曰天作孽可違也自作孽不可以逭尹吉曰惟尹

躬天見于西邑夏自周有終相亦惟終

夫音扶易竝音  
異費芳味反鄭

云或為嘖或為悖大音泰兌作說  
逭胡玩反吉讀告天作先相去聲

正義鄭氏康成曰溺謂覆沒不能自理出也人不溺  
於所敬者水人所沐浴自潔清者至於深淵洪波所

當畏慎也由近人之故或泳之游之褻慢而無戒心

以取溺焉費猶惠也言口多空言且煩數也

孔疏口出虛言

而無實口惠不難失在煩數

過言一出駟馬不能及不可得悔也

口舌所覆亦如溺矣民難卒諭人君敬慎以臨之則

可若陵虐而慢之分崩怨叛君無所尊亦如溺矣君

子慎所可褻乃不溺越之言廢也言無自顛廢女之

政教以自毀敗虞主田獵之地者機弩牙也度謂所

擬射也虞人之射禽弩已張從機間視括與所射參

相得乃後釋弦發矢為政亦當以已心參於羣臣及萬民可乃後施也兌當作說兌命傳說作以命高宗者衣裳朝祭之服惟口起羞當慎言語也惟甲冑起兵當慎軍旅之事也惟衣裳在笥當服以為禮也惟干戈省厥躬當恕已不害人也違猶辟也逭逃也尹吉亦尹誥也天當為先字之誤忠信為周相助也謂臣也伊尹言見夏之先君臣皆忠信以自終伊尹始仕於夏此時就湯矣夏之邑在亳西 呂氏大臨曰

小人謂民也君子謂士大夫也大人謂王公也凡人覆沒於患禍不能以自出者皆在其易而褻之也水至柔之物民狎而玩之則雖巨川深淵而不戒此取溺之道也德易狎而難親者謂水之德也與人交際不能無言古之君子辭達而已若於已則費於人則煩過言之甚至於害德喪身而不可悔非口之溺人乎民愚故蔽於心而不可理喻且賤故多鄙怨之心上不敬而慢之則輕身輕上無所不至此民之溺人

也引大甲言為政者如虞人射禽張機省括而後發  
有是心也安有溺於民之患哉兌命言庶政不可不  
慎也大甲言禍患之溺莫非自取也尹告言君以忠  
信有終皆君所自致也此引書為證與書文小不同  
義無所害 方氏慤曰前兼言大人小人此統言君  
子者君子上下之通稱 馬氏晞孟曰禍故多藏於  
隱微而發於人之所忽蔽於所襲而不知加慎以為  
慮此其所以至於沒溺而不知悟也費者言其無實

煩者言其無節言之非艱故易以出斯言之玷不可  
磨故難以悔蔽於易出以為常不知難悔以為慮此  
君子所以至於溺也敬者御民之道書曰予臨兆民  
若朽索之馭六馬為人上者奈何不敬不能莊以涖  
之而乃慢易以犯之此大人所以至於溺也衣服者  
所以命有德不可以命非其人故在笥言藏之而不  
輕於與人也干戈所以討有罪而不可以伐非其罪  
故省厥躬言當恕之於已然後可以責諸人也甲冑



所以自衛干戈所以敵物天作孽猶有可違之理蓋  
修德則可以消天變禍自己求無所逃於天地之間  
也 陸氏佃曰閑則不能受人鄙故係吝怨毒難解  
存疑鄭氏康成曰德易狎而難親者言有德者亦如  
水矣初時學其近者小者以從人事自以為可則侮  
狎之至於先王大道性與天命則遂扞格不入迷惑  
無聞如溺於大水矣難親親之當肅敬如臨深淵  
存異孔氏穎達曰卑賤小人居近川澤愛玩於水多

所覆沒君子以口傷人而致怨恨遂被覆沒如溺於

水

案鄭意以口惠人疏謂以口傷人意正相反又似以水譬口合兩為一疏例無此

辨正呂氏大臨曰先儒以德為人之德易狎難親豈德之謂耶方論溺水溺口溺民三者之別無庸以有德廁其間

子曰民以君為心君以民為體心莊則體舒心肅則容敬心好之身必安之君好之民必欲之心以體全亦以體傷君以民存亦以民亡詩云昔吾有先正其言明且

清國家以寧都邑以成庶民以生誰能秉國成不自為

正卒勞百姓君雅曰夏日暑雨小民惟曰怨資冬祈寒

小民亦惟曰怨

好竝去聲勞鄭去聲今如字雅今書作牙資今書作咨屬上句鄭讀至屬下句

祈書作祁案陸氏曰詩無上五句餘在節南山篇而無能字或皆逸詩也

正義鄭氏康成曰先正先君長也誰能秉國成傷今

無此人也成邦之八成也

孔疏周禮小宰職掌以官府之八成經邦治一曰聽

政役以比居二曰聽師田以簡稽三曰聽閭里以版圖四曰聽稱責以傳別五曰聽祿位以禮命六曰聽取予以書契七曰聽賣買以質劑八曰聽出入以要會皆成事品式以聽治於人

誰能秉行

之不自以所為者正盡勞來百姓憂念之者與

孔疏卒盡

也先正謙退能用仁恩盡勞來百姓今無有如此之人案朱子詩傳不自為政而以付姻婭之小人卒使

受其勞病勝鄭此註

疾時大臣專功爭美雅書作牙假借字君

牙書篇名周穆王司徒君牙作

案梅賾古文尚書是王命君牙為司徒

夏日暑雨小民怨天至冬寒小民又怨天言民恒多

怨為其君難

孔疏尚書云小民惟曰怨咨今此本作資字鄭又讀資為至以鄭不見古文尚

書故也

孔氏穎達曰此論君民相須養人之道不可

不慎也詩人稱昔吾之有先君正長其教令之言分

明且清潔國家所以安也都邑所以成也庶人所以  
生也詩逸詩也書言民心難稱君政雖當人怨不已  
是治民難也 呂氏大臨曰引詩言君不正百姓所  
以勞也引君牙言天之寒暑小民且怨况君之政教  
乎 方氏慤曰民以君為心好惡從於君也君以民  
為體休戚同於民也體雖致用於外然由乎心之所  
使故曰心好之身必安之心雖為主於內然資乎體  
之所保故曰心以體全亦以體傷荀子曰君舟也庶

民水也水能載舟亦能覆舟君以民存亦以民亡之  
謂也 陳氏祥道曰詩言昔吾有先正居人上者其  
言明且清則人可得而法謂之先正以其正身而後  
正天下也唯能正身以率之故國家以寧都邑以成  
庶民以生幽王不然權移於下故詩人傷之不能秉  
國成則政出多門而不自為政矣政多門則多事多  
事則百姓所以勞此幽王不明所以懷來之道也天  
之於民厚矣而寒暑之過正雨暘之失中民猶怨咨

則為上者可不敬乎

通論呂氏大臨曰天下無一物非我故天下無一物  
不愛我體或傷心則憊怛理之自然故大人自任以  
天下之重匹夫匹婦有不被堯舜之澤若已推而納  
之溝中豈勉強之所能為也體完則心悅猶有民則  
有君也體傷則心憊猶民病則君憂也所以安危存  
亡者亦然可不慎乎

存異鄭氏康成曰資當為至齊魯語聲之誤也祈之

言是也齊西偏之語也

案君雅依古文尚書則未脫一咨字

子曰下之事上也身不正言不信則義不壹行無類也

行下  
孟反

正義鄭氏康成曰類謂比式 孔氏穎達曰此明下  
之事上當一其守 陳氏祥道曰下之事上以身為  
本而信以成之也 方氏慤曰身不正故義不壹言  
不信故行無類不壹謂不能專於其身也無類謂無



以副於其言也 陸氏佃曰不壹無以統之無類無應之者

案臣之告君孰不以正然身者言之本自處以義則身正而言之於君亦信而樂從身不正不能事事皆出於義其發之言者與行絕不相類而望君之信從不可得也諸儒忘却下之事上句故說多膚

子曰言有物而行有格也是以生則不可奪志死則不可奪名故君子多聞質而守之多志質而親之精知畧

而行之君陳曰出入自爾師虞庶言同詩云淑人君子

其儀一也

行有之行去聲是以陸本作是故鄭云精或為清知如字一音智

正義鄭氏康成曰物謂事驗也格舊法也精知熟慮於衆也自由也師庶皆衆也虞度也言出納政教當由女衆之所謀度衆言同乃行之政教當由一也

孔氏穎達曰言必須有徵驗行必須有法式言行不妄守死善道名志俱善欲奪不可也質而守之親之畧而行之皆謂聞見雖多執守簡要也君陳成王戒

君陳之言詩曹風鴈鳩篇言善人君子威儀齊一證  
為政須齊一也 呂氏大臨曰有物則無失實之言  
有格則無踰矩之行如是者人歸於一而不可變也  
生乎由是死乎由是故志也名也不可得而奪也義  
重於生舍生而取義則不義之名君子所不受也多  
聞所聞欲博也多志多見而識之者質正也不敢信  
已質衆人之所同然後用之者也守之者服膺而勿  
失者也親之者學問不厭者也由多聞多志而得之

又當精思以求其至約而行之故曰精知畧而行之  
畧約也此皆義壹行類之道也君子之學必致一不  
致一則二三一者何理義而已以吾之所同然合人  
之所同然而已引書言當謀之於衆取其同然也引  
詩言君子之行卒歸於一也 陳氏祥道曰志者言  
行之所從出名者言行之所自成言有物行有格則  
志之所守者堅而名之所成者著是以生則不可奪  
志死則不可奪名 馬氏晞孟曰聞之志之則言有

所擇而言無所妄此言有物也知之則可以行知之  
已精而又畧而行之則行有所擇而行無所妄此行  
有格也

存疑鄭氏康成曰質猶少也多志謂博交汎愛人也  
案鄭訓質為少不如呂氏訓正為確言有物言皆至  
當之理行有格不踰規矩之中生必行其所求之志  
即死亦不變平生之所守而遺不令之名也要其所  
以然者則有學焉多聞多志者學之博必求其正者

擇之精然後取其至要者而行之所謂守之約也庶  
言同則言有物可知其儀一則行有格可知注疏連  
上章為一節陳皓本從之徐師曾分二章今案記者  
之意相承而子未必一時之言故從徐本

子曰唯君子能好其正小人毒其正故君子之朋友有  
鄉其惡有方是故邇者不惑而遠者不疑也詩云君子  
好仇

能好之好去聲正鄭讀匹今如字鄉  
許亮反又如字惡烏路反仇詩作逌

正義鄭氏康成曰鄉方喻輩類小人徼利其友無常

也邇近也仇匹也 孔氏穎達曰君子所親朋友及  
所惡之人皆有輩類故善者與之交不以榮枯為異  
不善者則憎惡之言有常也好惡有定可望貌而知  
故近不惑而遠不疑也詩周南關雎篇斷章云以好  
人為匹也 呂氏大臨曰君子之好不可以非其人  
故曰朋友有鄉所惡不可以及善人故曰其惡有方  
陳氏祥道曰君子小人異道故正人君子好之而  
小人毒之 方氏慤曰君子非特其身正而已於正

人又好而與之小人非特身不正而已於正人且毒而害之此君子小人好惡之辨有鄉有方言取舍之有常也

通論陳氏祥道曰邇者不惑儒行所謂並立則樂相下不厭也遠者不疑儒行所謂久不相見聞流言不信其行也 胡氏銓曰君子正直是與故好之小人惡直醜正故惡之君子居必擇鄉遊必擇士所以防邪僻而近中正也



存疑鄭氏康成曰正當為匹匹謂知識朋友

案鄭氏以正為匹然小人亦有同惡相濟者寧盡相  
毒耶不如陳說明確

子曰輕絕貧賤而重絕富貴則好賢不堅而惡惡不著  
也人雖曰不利吾不信也詩云朋友攸攝攝以威儀

上惡

鳥路  
反

正義鄭氏康成曰言此近徼利也攸所也言朋友以  
禮儀相攝正不以富貴貧賤之利也 孔氏穎達曰

此明交友之道以賢而貧賤則輕絕之是好賢不堅惡而富貴則重絕之是惡惡不著此貪利之人也詩大雅既醉篇美成王太平之詩於時朋友羣臣相攝佐之時以威儀也言不以富貴貧賤而求利者 陳

氏祥道曰貧賤者人之所易絕於其所易絕者而不絕然後為好賢之堅富貴者人之所難絕於其所難絕者而絕之然後為惡惡之著也 方氏慤曰可友者以其賢可絕者以其惡然賢者不必富貴惡者不

必貧賤苟輕絕貧賤而重絕富貴則勢利之交而已  
通論陸氏佃曰相好仁也相攝義也相好主內君子  
好仇是也相攝主外攝以威儀是也

案重絕富貴如揚雄蔡邕苟或輩所以貽萬世羞也

子曰私惠不歸德君子不自留焉詩云人之好我示我

周行

歸鄭云或作懷好去聲行戶剛反又如字

正義鄭氏康成曰行道也言示我以忠信之道 孔

氏穎達曰此明君子唯德是與詩小雅鹿鳴之篇周

忠信 馬氏晞孟曰有忠信之德然後將之以惠禮也苟無忠信之德而行之則君子不自留焉 呂氏大臨曰引詩言受人之好以示我至公而不比故也孔子曰君子周而不比周則徧徧則公比則有所附有所附則私

通論陳氏澂曰上文言好惡皆當循公道故此言人有私惠於我而不合於德義之公君子決不留之於已也

存異鄭氏康成曰私惠謂不以公禮相慶賀時以小物相問遺也言其物不可以為德則君子不以身留此人 孔氏穎達曰言不用留意此等人

案惠小惠德大德處我以禮物雖微亦德也惠而曰私非以此嘗我即以此泰我矣私惠不歸德謂小惠不足為德也君子不留如子思不受鼎肉孟子不為貨取是也鄭氏在公禮小物上說又以留為留此人似誤

子曰苟有車必見其軾苟有衣必見其敝人苟或言之

必聞其聲苟或行之必見其成葛覃曰服之無射

射音亦詩

作教

正義鄭氏康成曰言凡人舉事必有後驗也見其軾

謂載也敝敗衣也衣或在內新時不見射厭也言采

葛為衣服之無數言不虛也孔氏穎達曰此明人

言行必慎其所終也詩周南葛覃之篇馬氏晞孟

曰言有實於此有以徵於彼而君子不可無其實也

陸氏佃曰軾言前敝計後

存異呂氏大臨曰有軾則有車無車則何所憑而式有衣然後可敝無衣則何敝之有

案軾在車前車不止軾而先見其軾有其全必有所先見也衣之初服未至敝而終見其敝有其始必要其終也以興言雖隱而必聞行方始而必成之意引詩證衣則車可知

子曰言從而行之則言不可飾也行從而言之則行不

可飾也故君子寡言而行以成其信則民不得大其美而小其惡詩云白圭之玷尚可磨也斯言之玷不可為也小雅曰允也君子展也大成君奭曰在昔上帝周田觀文王之德其集大命于厥躬

行從則行之行並去聲寡鄭讀顧今如字

玷丁輦反奭音釋尚書今文作周田觀古文作割申勸文書作寧

正義鄭氏康成曰從猶隨也以行為驗虛言無益於善也玷缺允信也展誠也奭召公名君奭尚書篇名孔氏穎達曰此明重言之事言在於先而後隨



以行之則言須實行在於前言隨於後則行須實言行皆不可虛飾也君子言行相顧則人於美惡大小不得增減皆驗於行也詩大雅抑之篇刺厲王詩小雅車攻篇美宣王詩君奭書篇名周公告君奭之辭也 呂氏大臨曰飾言者所言非信故不可行飾行者所行必偽故不可言君子言顧行行顧言而已不可失吾信使民之稱美惡不敢有所大小而失其實也言之不信所謂玷也允也君子展也大成言君子

非信則不成也君爽言文王有誠信之德為天所命  
況於人乎

案人有小善言必飾而大之其夸飾在言人有大惡  
言必飾而小之其掩飾在行然言行相隨聽其言者  
必考其行言不可飾也觀其行者必察其言行不可  
飾也是故君子寧寡於飾偽之言而務實行其為善  
去惡之事惡日祛而小善日積而大使發於口者無  
不可信之言而民亦自從而化之矣引詩大雅以証

寡言小雅以証成信引書以証民皆化於君

通論呂氏大臨曰莊生之言非不善也卒不可以治天下國家此言之飾也五霸假仁義而行非不美也而後世無傳焉此行之飾也

存疑鄭氏康成曰寡當為顧聲之誤也古文周田觀文王之德為割申勸寧王之德今博士讀為厥亂勸與此二者異古文似近之割之言蓋也

孔疏今文伏生所傳歐陽

夏侯所注者古文衛賈馬所注者以文從壁中出故謂之古文即鄭注尚書是也蓋割亦聲相近

陸氏佃曰先儒謂虞芮質厥成諸侯並附以為受命之年故曰其集大命于厥躬

辨正陸氏佃曰寡如字言之必踐之是以寡民雖欲虛美隱惡不可得也所謂周田虞芮質成是也

案古文前人多疑之若此記所引今文作上帝周田觀文王之德古文作上帝割申勸寧王之德周田古無訓辭陸氏乃以虞芮質成言之其說亦似但周田字既無確詁又不若解割申勸者之說為協也緣屬

伏生所傳特存之以俟精者至博士之說則不可為訓矣

子曰南人有言曰人而無恆不可以為卜筮古之遺言與龜筮猶不能知也而況於人乎詩云我龜既厭不我告猶兌命曰爵無及惡德民立而正事純而祭祀是為不敬事煩則亂事神則難易曰不恆其德或承之羞恆其德貞婦人吉夫子凶

與平聲兌讀說鄭云純或為煩貞周易作貞

正義鄭氏康成曰恆常也不可為卜筮言卦兆不能

見其情定其吉凶也猶道也言褻而用之龜厭之不告以吉凶之道也惡德無恆之德也純或為煩惡德之人使事煩事煩則亂使事鬼神又難以得福也

孔氏穎達曰龜筮猶不能得知無恆之人況於凡人乎詩小雅小旻篇刺幽王數誣卜筮說命傳說告高宗之辭言惡德之人主掌祭祀其事則煩事煩則致亂也易恆卦九三六五爻辭引之以証無恆其行惡也 呂氏大臨曰德歸於一則有恆二三則無恆鬼

神之理至虛而善應齊戒潔誠虛心以求之猶有不  
應將以二三不定之私意瀆而求之其可得乎 馬  
氏晞孟曰婦人無攸遂在中饋吉德不可以無恆夫  
子以知率人德不可以無變所謂婦人之從一而終  
夫子制義從婦而凶與此合

存疑鄭氏康成曰純猶皆也言君祭祀賜諸臣爵毋  
與惡德之人也民將立以為正言放傲之疾事皆如  
是而以祭祀是不敬鬼神也

孔疏此明為人臣之法  
當有恆言若爵此惡德

之人立之以為正事在下必學之若每事皆爵  
此惡德之人主掌祭祀是不敬鬼神難得其福 偵問

也問正為偵婦人從人者也以問正為常德則吉男  
子當專行者事而以問正為常德是亦無恆之人也

孔氏穎達曰南人殷掌卜之人

案孔疏無據朱子曰南人南國之人

陸氏佃曰民立而正正讀如政民立而正事純即  
書所謂惟厥攸居政事惟醇也而祭祀是為不敬即  
書所謂黷于祭祀時謂弗欽也爵罔及惡德民立而  
正事純可謂善矣然祭祀為不敬則事煩不能不亂



事神難矣事煩讀如事神之事雖然恆其德矣不知化而趨變是亦凶而已矣故經合二文以為一

案書兌命之意言無恆之人是謂惡德朝廷爵命罔有及者則民亦惟立汝正事改惡脩德可矣若純求之祭祀以希爵命鬼神聰明正直而諂黷之是謂不敬也祭愈煩而心愈亂以此事神不亦難乎下又引易見所謂恆者非拘固之謂可與立又當可以權以足上文之義

欽定禮記義疏卷六十九

謹案第五頁前二行三行下必有甚者矣刊本甚  
下衍焉字據各本禮記刪

第九頁後七行使行顧言刊本使下衍人字據禮  
記孔疏刪

第十二頁前三行狐裘取溫裕而已刊本脫裕字  
據孔疏及毛詩箋增

第十二頁後三行吉當為告刊本當作讀據禮記  
鄭注改

第十五頁後二行則百姓疑惑刊本惑訛貳又下  
懷欺詐刊本欺訛疑並據禮記孔疏改



總校官庶吉士臣侍朝

校對官編修臣李光雲

謄錄監生臣孟錫山